

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

1 ¹Pablo, i que seje ra. Dios que seirabo Jesucristo renei nenei sacuã nda. Aico ã mbesa jêje a. Nanderesenda Sóstenes ndese aico embesa jêje a. ²Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo riñ ùquĩ. Dios riqui jemingo icúe umbaerã ùquĩ. Sã Dios riqui mangue jenda chooñoa mingó icúe umbaerã no, eĩ si. Ñee mose Jesucristo je. Jesucristo rei ùquĩ abe rerecua no. Sã nandererecua nande no. ³Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turâte riqui jêje co, i Pablo

⁴Dios turã tuchi que eriqui jêje Jesucristo riñ nda. Nyebe aico nguiã gracias i tuchi Dios je jeniĩ co. ⁵Jesucristo quiato chõ jê cote re. Nyebe Dios riqui turã tuchi nguiã jêje co cote. Jembaaquiato tuchi ucheẽ nenei nenei sacuã mbia je. Jembaaracua tuchi que ucheẽ niĩ nda. ⁶Ure Jesucristo renei nenei mose jêje que jêisi turâte ra. Jê Jesucristo jêicuate quia ùquĩ cote. ⁷Nyebe Dios turã ndiqui nguiã hui áte jêsi co. Jembirãcuã mbeite equia querabe co. Ùquĩ jêingo Jesucristo raarõ arõ ùquĩ. ⁸Dios ra jembirãcuã mbei mingó mbae ua ja chee. Mbia mo nda ñee icuã eã jêje Jesucristo tu mose. ⁹Dios ra jendeaquiato bei. Ucheẽ nda embuchebiã mbei ñeende jêje. Ae quiato ngue ñee nguiã jêje. —Taemingo bei seriiri ndese Jesucristo rese, i.

Jesús quiato nyao nyao chõchĩ nyesi

¹⁰Seresenda, nandererecua ja chõ Jesucristo resẽ. Jenyao chao mose nyesi, eicuãte ùquĩ. Hue rĩ ja chõ jêingo ndua ndua. Mbae miĩ ndese chõ

jëingo. ¹¹Mbia quiatu ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jeniï nda. ¹²—Pablo mbae chõ se re, i chõchĩ jemo nguiã seriĩ ùquĩ. —Apolos mbae chõ se re, i chõchĩ jemo nguiã ùquĩ no. —Pedro mbae chõ se re, i chõchĩ jemo nguiã no. —Cristo mbae chõ se re, i jemo no. ¹³¿Cristo mbuchao chao ji ere no? ¿Pablo mano jendiquicharõ nde no? ¿Pablo riĩ bautizar i jėje re no? ¹⁴Se que bautizar ae eã jėje resẽ. Crispo miĩ je que bautizar ae ra. Gayo je abe. ¹⁵—Pablo riĩ ño ngue bautizar i nguiã seje, i aroneate jemo ñee seriĩ. ¹⁶Estéfnas chuchua jenda abe que bautizar ae ra. Aquere que bautizar ae ãte jemo je ra. ¹⁷Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, i nda mbia ndua ndua eãte rei Cristo mano ndese.

Dios cheẽ quirãcuã tuchi Jesús riĩ

¹⁸Ae ra nyoĩ tata cuásuu, ùquĩ ndei “ichõĩñoosa” isa Dios cheẽ nenei neneisa riĩ. —Cristo que mano mbia riquicharõ nda, i mose ee, “ichõĩño ñene” i chõ nguiã. Nande quiatu que Dios nanderirõ nandeicuã si ra. Nyebe Dios cheẽ turã ndiqui nguiã uquirãcuã ndeacuquia nande je co. ¹⁹¿Nde Dios cheẽ mbesa ji ã:

Ae “seaquiato tuchi” i quia, ùquĩ aquiato ra ambuquiachã esi.

Ae “searacua tuchi” i quia, ùquĩ aracua abe ra ambuquiachã esi no, i que Dios cheẽ mbesa ji ra. ²⁰Ae uquiato saã saã nguia, ibi jenda ja chõ ùquĩ nde. Ae ucheẽ aquiato saã saã nguia, ibi jenda ja chõ ùquĩ no nde. Eaquiatoate ùquĩ, i chõ Dios nguiã ùquĩ je. ²¹Mbia ae ra Dios icuayã mbei uquiato ae je. Dios cheẽ ae je quia nda mbia Dios icua nguiã emo Dios cheẽ nenei nenei mose ee. Ae Dios cheẽ isi nae, ùquĩ nda Dios sirõ eicuã si. Ichõĩño nguiã, i raque mbia ataque Dios cheẽ niĩ. ²²—Mbia mae sayã ndese nda uremae na ña, i bei que judíos quia ra. —Urechimbaaquiato tuchi rã, i bei que judíos eã nguia ñee nyue no nda. ²³Nande quiato Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. Ùquĩ si judíos ireĩte riqui ã. Cristo renei nenei mose, judíos eã ndua eã tuchi chõ nguiã erese ã. ²⁴Nande quiato nandebite riqui nguiã Cristo renei nenei mose ã. Dios judíos mo irabo chõ nguiã. Judíos eã mo abe irabo chõ nguiã no. Ùquĩ je chõ ngue Cristo Dios quirãcuã mee nguiã. Ùquĩ je chõ Cristo Dios aquiato mee nguiã. ²⁵Dios aquiatoate, i raque mbia mo ñee Jesús mano je riĩ. Dios quia aquiato tuchi jiri riqui nguiã mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguiã mbia si co.

²⁶Dios que jëirabo ja ra. Jëaquiato tuchi eã ndaque ee. Ererecua eã ndaque jë. Mbaecha eã ndaque jë. Dios ae chõ ngue jëirabo nguiã. Ùquĩ

ndese jendua jiri. ²⁷Ae je mbia riqui “eaquiataũte” i nae, ũquĩ ño ngue Dios irabo nguiã. Ae ucuasu saã saã nguia nae, ũquĩ ireĩ ireĩ sacuaã esi. ²⁸Ae mbia ataque ucuayãte quia nae, ũquĩ ño ngue Dios irabo nguiã. Ae ucuasu saã saã nguia nae, ũquĩ mbutiã sacuaã. ²⁹Nyebe nandeico nguiã nandeaquiata raã naa aroneate Dios je ã. Nande mii mo jiri jiriã. ³⁰Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹Sã embesa ji riqui ñee ã no:
 Ae Dios saã nande je nae, ũquĩ ñii nandechẽ turã.
 A e nandesã nande ae nae, ũquĩ ñii nandechẽ turã eã,
 i que embesa ji ra.

Jesucristo mii Pablo senei senei mbia je

2 ¹Seresenda, seso mose jendea que Dios cheẽ asenei senei turã jẽje huee resẽ. Seaquiata asaã saã eã ño nguiã jẽje Dios cheẽ nenei nenei. ²—Jesucristo mii ño tasenei senei jẽje. Jesucristo mano nguia mbia icua ndiquicharõ nae, ũquĩ mii ño tasenei senei jẽje, ae chõ ngue oso nguiã ñee jẽje. ³Seireĩte que seso mose ñee jẽje nyii ra. Semburirite que aque mose ra. ⁴Seaquiata que asaã saã eãte quia ra. Dios cheẽ ngue ambuchecua tuchi quia ñee ñee jẽje ra. Espiritu Turã nguiatu que secheẽ mbirãcuã tuchi quia ñee ñee jẽje ra. Nyebe mbia ñee nguiã. —Dios cheẽ ño eriqui re, i nguiã secheẽ mose. ⁵Dios quirãcuã ae jemingo nguiã Jesucristo rese ũquĩ. Mbia mo aquiata eã ño jemingo nguiã Jesucristo rese ũquĩ.

Espiritu Turã ndiqui mbae icua jate nande je co

⁶Ae seaquiature, ũquĩ ja chõ asenei senei mbei nguiã Jesús quiato je co. Ae seaquiature nae, ibi jenda rã eã ño seaquiata riqui nguiã co. Ae seaquiata nae, ibi jenda rerecua rã eã ño seaquiata riqui nguiã co. Ũquĩ aquiata quia ra tiã jei. ⁷Ae ureico ñee ñee nae, ũquĩ nguia mbia mbaaquiata jiri nguiã. Dios cheẽte quia ñene. —Secheẽ nda ambuchecua je nguiã mbia je. Mbia mingo bei sacuaã, i que Dios nyii mbae ao nonde ra. Dios que esenei eã nyii ra. Namõ ño embuchecua nguiã nande je cote. ⁸Mbia rerecua que Dios aquiata icua eãte ra. I nda eririĩ mbucha eãte rei ira rese. ⁹Sã embesa ji riqui ñee ã no:
 Dios ra mbae turã saã tuchi nande je. Uchesequa je.
 Ae ra Dios saã nande je, ũquĩ ndese emo iranuate namo.
 Emo mae ãte erese namo,
 i que embesa ji ra. ¹⁰Nande quia nandeico nguiã irandu erese ã. Espiritu Turã quiata nandembiirandu nguiã. Espiritu Turã nguia mbae icua jate nguiã co. Dios chiaõ abe icua jate equia co. ¹¹Ae rese emo ndiqui ndua,

mbia mo ũquĩ ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espiritu Turã mii ño eicua nguiã. Dios sí chõ Espiritu Turã nde. ¹²Dios que espiritu mbuae mo monoã nande je ra. Espiritu Turã ño ngue emondo nguiã nande je. Ae Dios saã turã nguia nande je nae, ũquĩ ndese nandembiirandu sacua ño ngue Espiritu Turã mondo nguiã nande je. ¹³Ae Dios saã turã nguia ure je nae, ũquĩ uresenei senei nguia ã. Ñ ndese chõ ngue Espiritu Turã urembaaquiato nguiã. Mbia cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴Ae Jesucristo icua eãte, ũquĩ sí Espiritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte. ¹⁵Ae Jesucristo icuate nae, ũquĩ nguia mbae icua jate nguiã ã. Ae eturãte nae, ae eicuãte nae, ũquĩ icua ja equia ã. ¿Mañi Jesús quiato quia re? i chõ mbia nguiã Jesús quiato cheẽ icuayã ã. ¹⁶Tarembaaquiato, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

Mbae mii na ño ureico nguiã Dios cheẽ nenei nenei

3 ¹Jesús resenda jẽingo raque ũquĩ. Jẽingo tuchiãte quiato nguiã erese ũquĩ. Ae jembite riqui nae, ũquĩ mii ndese chõ jẽingochĩ nguiã ũquĩ. Ae Cristo bite nae, ũquĩ ndese jẽingoã ñochĩ nguiã ũquĩ. Nyebe jaembaaquiato tuchi aroneate equia co. ²Mbia riirĩ na ño jẽingochĩ nguiã secheẽ andu mbirĩ mbirĩ cose. Querabe chõ jẽingo nguiã secheẽ andu serea ũquĩ. Nyebe jaembaaquiato quiato tuchiã nguiã Jesús cheẽ ndese. Ae jembite riqui nae, ũquĩ ndese jẽingo mose ra Dios cheẽ jẽicuayã mbei. ³Jẽicuã icuãte quia jẽingo nguiã jenyue ũquĩ. Jendua turã ja eãte equia ũquĩ. Jeñee turã turã eãte quiato nguiã jenyue ũquĩ. Nyebe acheẽ nguiã jẽje. —Ae Cristo bite nae, ũquĩ ndese jẽingoã ñochĩ nguiã ũquĩ, ae chõ ndei nguiã jẽje co. ⁴—Se rei Pablo mbae, i chõchĩ jemo nguiã ñee ũquĩ. —Se rei Apolos mbae, i chõchĩ jemo no. Nyebe jẽingo eã nguiã Cristo bi rese ũquĩ.

⁵¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jẽje que Jesús jẽicua resẽ. ⁶Mbae tiquia ji rã ño jẽ nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jembaaquiato quiato nguiã cote. Dios quiarei ucheẽ mbusuri raanguia jeñiangui re. ⁷Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸Ae echitiquia quia, ae i icherẽ cherẽ nguia erese, eĩ si chõ ũquĩ nde. Dios ra mbae turã mee ee, ae esaã ũquĩ ndibishorõ. ⁹Ure rei Dios

cheẽ naa naasa. Sã chacochoa no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰Dios turã tuchi que seje ra. Seje quiatu ngue ucheẽ mee nguiã. Mbia mbaaquiato quiatu sacua. Tuchua ao aquiato rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹Tuchua i raanguia chõ Jesucristo riqui nguiã. Ae mii tuchi chõ tuchua i raanguia re. ¹²⁻¹³Ae arõ tuchua mo nandesã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ûquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja. ¹⁴Nandechisaã siqui i i mose, Dios ra mbae turã mee nande je. ¹⁵Nandechisaã oquei mose, nandembae ra quiachã nandesĩ. Nande quia ra nandequiachã yã ndaque. Nandecuasẽ ndaque ra ibate Dios je. Nandechi quiato ra nandeico cote.

¹⁶¿Jêtesareĩ chõ ere? Dios chuchua chõ nanderete riqui co resẽ. Dios riqui beite nandeye co. Espíritu Turã ndiqui beite nandeye co. ¹⁷Emo Dios chuchua mbiicuã mose, aque ra Dios mbutiã. Nande quia Dios chuchua re. Dios que uchuchua mii icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

¹⁸—Nandeaquiato, jenyechĩ nguiã jeñiangui re ùquĩ. Ae equiato ibi jenda achõ ndese, sã ùquĩ uquiato raã naa eã. Siqui mingue mose ra Dios embaaquiato turã cote. ¹⁹Ae equiato ibi jenda achõ ndese, “equiataũ”, i chõ Dios nguiã ùquĩ je co. Sã embesa ji riqui ñee no:

Dios ra ùquĩ aquiato mbutiã ño cote.

“Seaquiato tuchite aico co”, i quiatuchĩ ngue nyii re, i que embesa ji ra. ²⁰Sã embesa ji riqui ñee no:

Ae rese equiato riqui ndua nae, ùquĩ Dios icua tuchite quia co.

Ndua ndua iru chõ nguiã,

i que embesa ji ra. ²¹iMbia aquiato mo ndese ra jeñimbucha chooñochĩ jẽ! Dios quiato que mbae mondo ja jẽje ra. ²²Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingo mose, jẽje chõ emingo. Dios mbia mingo eã mose, jẽje chõ emingo eã. Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene. ²³Cristo mbae chõ jẽ nde. Dios mbae chõ Cristo no nde.

Ureaquiato tuchi Jesús chimbaaquiato si, jenyechĩ nda jẽ

4 ¹—Cristo rimba ja chõ ùquĩ nde, jenyechõ serĩ. Apolos riĩ abe no. —Ae ambuchecua eã mbia je nyii, ùquĩ jembuchecua checua mbia je serĩ cote, i que Dios ure je ra. ²Dios rimba mose nande, Dios cheẽ nandemumbayã mbei chõ nguia. ³—Serimba turã ño nde re, i ra Dios seje

reae. Nducuã. Aicuayãte se. —¿I se jêje re? ae âte se quia jêje co. Ae âte se quia emo je co no. Dios miî ño seicua nguiã. ⁴Dios rimba turãte aico reae. Dios ae chõ seicua nguiã. ⁵—Dios rimba turã ño aque re, ijenye jeichĩ nda emo niî jê! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶Jembaaquiato sacua ño aico nguiã ñee jêje co. Sechue si chõ aico nguiã ñee. Apolos riî abe chõ aico nguiã ñee. Dios rimba achõ ño ure re. Ure miî mo ndui jêingo bei aroneate. Dios rimba ja rui chõ jêingo. Eî jenye mose ra embesa ji jemumbayã. ⁷¿Mbaerã nda jêcuasu jêsaã saã nde? Ae jendeco jembraerã nae, Dios chimondo ja chõ ûquĩ nde. Jêaquiato mose, Dios ae jembaaquiato nguiã. —Se ae que sembae asaã saã nda, ijenyechĩ nda jêcuasu raã naa jê!

⁸—Ureaquiato tuchite cote, jenyechĩ ngue ñee nda. —Ureico Dios cheë icua jate co, jenyechĩ ngue ñee no nda. Ererecua tuchi jêsaã saãchĩ ureririrõ cote. Ererecua jêsaã ñooño na jê no. Se abe ra ererecua asaã saã ndei jê na ndeae. ⁹Dios ucheë nenei neneisa quirirõ jiri ure reae. Mbia tarõ ji rã ño ureico uremano ndaarõ arõ ndeae. —¿Mañi ã nguia re? i tuchi mbia quia mae nguiato urerese co. Angeles abe ñee nyee mae nguiato urerese. ¹⁰Ureico tuchi mose Cristo rese, “eaquiatoã”, jenye chõchĩ equia ure je ûquĩ. “Ureaquiato ure”, jenye chõchĩ equia jê jêingo mose Cristo rese ûquĩ. Urequirãcuã neãte ure, jê jêquirãcuã mose. Mbia ureosei chiãte ure; jê nguia mbia jêoseite nguiã. ¹¹Mbae eã mbeite urembae namo abe. Uteriãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icuã icuã mbeite ure je. Urechuchua eãte abe no. ¹²Mbae uresaã saã tuchite quia ureo je co. Mbia icuã icuã mbeite riqui ure je co. Urecheë turã turã mbeite equia ure ee ã, ûquĩ ñee icuã icuã mose ure je. Urechecua chõte equia ñimbirãcuã ee ã. ¹³Urecheë mingue beite equia ûquĩ ñee icuã mose ure je ã. Mbae quia rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴Jêirei irei sacua eã ño aico nguiã ã mbesa jêje ã. Jemundua ndua sacua ño ñene. Seririite quia jê nde. ¹⁵Jembaaquiato quiatusa tubiriãte raque Cristo riî. Se miî tuchi chõ jendu re. Se rane nguiato ngue echeë turã asenei senei nguiã jêje nyii. Se quiato ngue Cristo aicua uquia nguiã jêje. Nyebe aico nguiã “seriiri” i beite jêje co. ¹⁶Nyebe jêingo se rã si. ¹⁷Timoteo amondo quia jêje aque. Ae rei sechimbaaquiato tuchi. Nyebe “seriiri” ae tuchi nguiã ee. Ae quiarei siqui turã tuchi Dios rese. Ae ra jemundua bei secheë ndese. Sechisaã ndese abe no. —Eî ngue Pablo quia Jesús quiato mbaaquiato quiato sucha mbuchesea sea mose ra, i ra Timoteo jêje seriî. ¹⁸Jemo ndiqui uquiato raã naa tuchi chĩ ûquĩ. —Pablo ra tu eã mbei urerea, i chõchĩ jemo nguia seriî ûquĩ. ¹⁹Aso jei ra jendea,

Dios eno i mose seje. Ae uaquiatu saã saã tuchi quia jemo nae, ùquĩ tatea cote. Mañi nda equia mbae raã ndeae. Echeẽ achõ achandu sereã. ²⁰Dios rimba cheẽ achõ aroneate. Siqui eã mose Dios quirãcuã ndese. ²¹Manyae ra jêje seso mose jendea reae. Acheẽ asi asi ra jêje reae. Aico mingue chõ nda jêje renoae. Jêhui mose jêicuã si, acheẽ asi asi eã nda seso mose jendea.

Ae siqui ngu ninisi rese, aque jemombo

5 ¹Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jêataque jêtea choõño mbae icuã naa mose re? Ae Jesús quiato ãte nae, ùquĩ ño siqui ãte ngu ninisi rese. ¿Mbaerã Jesús quiato quiatu siqui ngu ninisi rese re? ²Jêturã jêsaã saã mbei chõchĩ nguiã jê ùquĩ. Jêya eã eã ño jêingochĩ ùquĩ ndese ùquĩ. Jêireĩ ngũfã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³Ishote aico raque jêsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechiangu i re co. Se siqui raanguia jendese. ⁴Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵Ae siqui ngu ninisi rese nae, aque jemombo chõ jêsi. Jesús quiato si. Jemee ño Satanás je. Ì nda Satanás erete mbasi. Ì nda eã siqui bei Jesucristo tu mose cote.

⁶¿Mbaerã jeingo jêturã naa naa mbae icuã ndea choõño nde? Levadura rã ño mbae icuã nde. “Levadura ñetẽ nda oso raque mbichae raã namo mose. Mbuchimatã ja rae”. ¿Ùquĩ jeñanuãte quia re? ⁷Ae eicuãte nae, aque jemombo jêsi. Ì nda jê abe mbae icuã jêsaã eã. Dios que Jesucristo iquia nandeicuã ndibishorõ nda.da. Sã mbia riqui oveja iquia iquia huiicuã ndibishorõ no. ⁸Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹—Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jêje nyii. ¹⁰Ae Jesús quiato ãte, ùquĩ ñii eã ño ngue acheẽ nguiã jêje. Nandechẽ eã aroneate Jesús quiatoã je nandeico mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguiã nae, ae siqui Dios abareã ndese nae, ùquĩ je nandechẽ eã aroneate. ¹¹Jesús quiato mo ùquĩ icuã naa mose, jemombo chõ jêsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia choõñoã mose. Quiacua mose. Mbae mbuquiachã mose. Jesús quiato ùquĩ naa naa mose, jêhui chõ esi. Jêquiaru jiri jiriã tuchi ùquĩ ndese. ¹²Jesús quiatoã nandeteaquiatu aroneate. Ae Jesús quiato, ùquĩ nguiatu nandeteaquiatu. ¹³Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jêsi.

Jemo icuã icuã mose nyue, jê ae chõ jêingo

6 ¹Jemo icuã icuã mose nyue, jêsochĩ nguiã ñee Jesús quiatoã nderecua je. Jê ae chõ jemae erese ae. Jêicuã ae. Sã Dios quiato achõ ño ñee ũquĩ je. —iEĩ jenyê jê! i ũquĩ je. ²Dios quiato quia ra “ieĩ jenyê jê!” i ja Dios quiatoã je emo mose. Jê nguiã ra “ieĩ jenyê jê!” jenyê mbia ataque je emo mose. ¿Mbaerã jêingo “ieĩ je nye jê!” ise reã mbae ñetê naa mose re? ³Angeles je abe chee ra “ieĩ jenyê jê!” nande. ¿Ūquĩ ndese jêiranuãte re? ã ibi jenda je “ieĩ jenyê jê!” nande turã ja rã ae. ⁴Jesús quiato chõ jê nde. Ibi jenda mo ñii jemo icuã icuã mose nyue, jê ae chõ jemae ũquĩ ndese. Jêsochĩ nguiã ñee Jesús quiatoã nderecua je. Dios quiato eãte quia ũquĩ nde. ⁵Jesús quiato mo ñee icuã icuã mose nyue, ¿jemo jêaquiatuãte ñee ee re? “iEĩ jenyê jê!” i ee re. Jê jêireĩ ireĩ sacua ño aico nguiã ñee jêje ũquĩ. ⁶—¿Mañi ure ra re? i aroneate Jesús quiato ñee Jesús quiatoã nderecua je.

⁷Jemo Jesús quiato mo icuã icuã mose nyue, echia turã tuchi ãte quia ñene. Jeñimbiracuã ño mbae icuã naa mose jêje. Jeñimbiracuã ño jembae mbuquiachã mose no. ⁸Jê abe mbae icuã jêsaã saã ñochĩ, ñimbiracuã ndocoĩ. Jê abe jendesenda mbae jembuquiachã ñochĩ Jesús quiato mbae, ñimbiracuã ndocoĩ.

⁹⁻¹⁰Mbia rerecuarã tuchi ra Dios cote. Aque mose ra mbia icuã siquã tuchi Dios rese. Ae siqui emo ninisi rese nae. Ae siqui ngüinisiã ndese nae. Ae ndua chooño nguiã Dios abareã ndese nae. Ae siqui quia nyiese ngüinisi raã naa nguesenda je nae. Ae mbae mbuquiachã quiachã nguiã nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ūquĩ nda siquã tuchi Dios rese. —Eicuã abe ra siqui bei Dios rese, ijenyechĩ nda ñimbiĩrĩ irĩ jê! ¹¹Eĩ ngue jemo icuã cose ra. Dios ae jembitirõ nguiã cote. Dios chõ jemiã nguiã icúe umbaerã cote. Espíritu Turã ngue jêisi turã Jesucristo riĩ cote ra.

Espíritu Turã nyuchua chõ jendete re

¹²—Co rese ra ereicohĩ, i ãte raque Dios quia seje mbae mo ñii. Dios biãte nande mbae raã ja chooño mose. Mbae mo sembiicuã serĩ mose, asaã eã mbei ra se. ¹³Nandechiurã ndei nanderie ye sacua. Nanderie rei nandechiururã. Ūquĩ ja ra Dios mbutiã emo mose cote. Dios mbaerã ño nanderete re. Siqui chooño sacua eã ño emo ninisi rese chõ nanderete re. Nanderete rerecua chõ Dios re. ¹⁴Dios quirãcuã ño ngue Jesucristo raaque mbuquera nguiã. Eĩ ño nda Dios quirãcuã nanderaaque mbuquera nguiã nande abe no. ¹⁵¿Jêiranuãte quia jendete rese re? Cristo nanderete mbucha quia uchiese co. Cristo rete chõ nandeico nguiã co cote. Cristo rete nandembucha aroneate cuña icuã ndete mo ndese. ¹⁶Emo siqui mose cuña icuã mo ndese, erete ucha chõ nguiã nyiese aque. Erete nyeremo eã

ño cote re. Ũquĩ ndete ja ra co miĩ cote, i que Dios cose ra. ¹⁷Emo siqui mose Cristo rese, nguete mbucha chõ nguiã erese ũquĩ cote. Erete miĩ na ño ũquĩ cote re. ¹⁸iJeninisiã ndese ra jëingochĩ jẽ! Mbae icuã mo naa mose, ũquĩ nda nanderete mbiicuã yã jiri. Siqui mose ngüinisiã ndese, ũquĩ nguiã ra nanderete mbiicuã tuchi cote. ¹⁹Espíritu Turã siqui chee jeñiangui re ũquĩ. Espíritu Turã nyuchua chõ jendete re. Dios mbae chõ jẽ nde. Jembae ae eã ño jendete re. ²⁰Eicuã nimba rei ngue jẽ nyii re. Dios quiatu ngue jëisi nguiã cote. Nguiirĩ ngue emondo jendibishorõ nda. Nyebe jëingo jendete mee Dios je. Jëãĩ abe jemee ee noae.

Pablo mbia mbaaquiato emo ngüinisi rerequia riĩ

7 ¹Jeñee ngue jembesa mondo seje nyii nae, ũquĩ tasibishorõ jëje cote. Coche emo siqufã nguiã cuña mo ndese. ²Coche mbia ngüinisi ae rerequia nguiã. Coche cuña ngu miĩ nderequia nguiã no. Emo ndese siqui chooño eã sacuã ño ũquĩ nde. ³Sã eru riqui turã ngüinisi rese. Sã eninisi abe riqui turã ngu rese. Nyao aroneate nyesi. ⁴Eninisi rete chõ eru mbae cote re. Eru rete chõ eninisi mbae cote no nde. ⁵Nya i aroneate eru ngüinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ũquĩ. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embiicuã arõte cote. ⁶—Jeninisirã jendeco, ae ãte quia jëje co. —Jeninisibi mose, jendeco ae, ae chõ nguiã jëje co. ⁷—Sã Jesús quiato ja ninisiã ndiqui se rã si, ae rei que se ra. Dios cheẽ eã ño ũquĩ nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngüinisi quereco sete nguiã no.

⁸Ae eninisiãte nae, ũquĩ je tacheẽ. Eru cheecha je abe tacheẽ no. Coche jëingo nguiã jendu eã. Coche jeninisiã ndiqui nguiã no. Se rã si. ⁹Jeñimbirãcuã yã mose jendete je, jeninisirã mo jëtea ae. Jendurã mo jendeco noae. Mbia mo osei osei rocoĩ.

¹⁰Ae ngu quereco nae, sã ũquĩ ngu rechayã mbei. Jesús cheẽ tuchi chõ ũquĩ nde. Secheẽ ae eã ño ũquĩ nde. ¹¹Cuña mo ngu recha mose, sã eriqufã mbei emo ndese. Sã ae ae chõ ndiqui bei, ñimbuchã si eã mose ngu rese. Sã eru abe ngüinisi rechayã mbei.

¹²Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngüinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngüinisi rese, sã eninisi siquichõ erese no. ¹⁴Jesús quiato mose eru, eru ngüinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eririĩ abe Jesús icuayãte rei, ũquĩ ande. ¹⁵Jesús quiato mo ninisi siqufã mose Jesús rese,

“seru tasecha” i bei mose, sã eru eriquisã quisã eã. Cuña mo Jesús quiato mo ndu siquĩã mose Jesús rese, “seninisi tasecha” i bei mose, sã eninisi ngu riquisã quisã eã no. Ûquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra. ¹⁶Ae Jesús quiato nae, ùquĩ ngũinisi mingo arõte Jesús rese. Ae Jesús quiato cuña nae, ùquĩ ngu mingo arõte Jesús rese no.

¹⁷—Eĩ jenyee chõ nguia jẽ ae ae, i que Dios nandechiaorã mee mee nande je ra. Ûquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ûquĩ ño asenei senei nguia Jesús quiato ishonda jaje abe. ¹⁸—Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ùquĩ nguia Dios bite re. ²⁰Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²²—Eico serui, i mose Dios mbia rimba mo je, Dios embui chõ nguia eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³Jesucristo que mano jẽje ra. Nyebe Jesucristo rimba ae chõ jẽingo nguia ùquĩ cote. Mbia rimba ae eã ño jẽingo nguia ùquĩ cote. ²⁴Dios que ñee nande je nyii, aque mosenda raanguia bei chõ nandeico Dios rese.

²⁵Nyucuaaque riĩ tacheẽ ndaque jẽje cote. Dios que ñee ãte seje ùquĩ nii nda. Se ae chõ tacheẽ jẽje. Airandu que Dios ia eã mose serese ra. Nyebe aico nguia ñee ñooño eã tuchi jẽje co. ²⁶Sã mbia ngũinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguia Jesús quiato je ã cote. ²⁷Neninisi mose, eico bei chõ erese erechayã mbei. Neninisiã mose, nde ae eico bei. ²⁸Neninisirã ndea mose, eicuã eã ño ùquĩ no nde. Nyucuaaque ngurã mo ndea mose, eicuã eã ño ùquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguia ñee jẽje. —Jẽ ae jẽingo jeninisiã, i jẽje. ²⁹Tacheẽ tuchi rã jẽje, Seresenda. Mbae ra ua jei ja nande je cote. Ae ngũinisi quereco quia, sã ùquĩ ndiqui ngũinisi rerequia eã naanguia. ³⁰Ae eya eãte riqui, sã ùquĩ ia tuchi raanguia riqui no. Ae eyate riqui, sã ùquĩ ia eãte raanguia riqui no. Ae mbae isi quia, sã ùquĩ ndiqui mbae isiã naanguia no. ³¹Á nandeico rei nguia íbii ã. iIbi jenda rese ra nandendua tuchichĩ jẽ! iÁ ibi jenda ja ra ua ja chõ jẽ!

³²—Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ùquĩ ndua ndua bei arõte Dios miĩ ndese. Ae Dios bite, ùquĩ esaã saã mbei arõte. ³³Ae eninisi nae, ùquĩ ndua ndua bei arondete ibi jenda achõ ndese. Ae eninisi bite nae, ùquĩ esaã saã mbei

arondete. ³⁴Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ũquĩ nda esaã saã mbei ee. Siqui tuchi ra Dios rese. Ae ngu quereco nae, ũquĩ ndua ndua bei arondete ibi jenda achõ ndese. Ae eru bite nae, ũquĩ esaã saã mbei arõte. Siqui rocoĩ Dios rese. ³⁵Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jėje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶—Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eĩcuã eã ño nguiirĩ ndurã mee ee re. ³⁷—Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ũquĩ abe. ³⁸Ae nguiirĩ ndurã mo mee ee, eturã ño ũquĩ nde. Ae nguiirĩ ndurã mo mee eã ee, eturã tuchi chõ ũquĩ cote re.

³⁹Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ ndeae. Espĩritu Turã abe sembucheẽ nguia reae.

Ae soo mbia mondo rei dios abareã je nae

8 ¹—Mbia soo mondo mundo quia dios abareã je nae, ¿ũquĩ soo ra nandeu re? jenje que seje. Ũquĩ tasenei jėje cote. —Seaquiatute se, nande ja jate raque quia ã. Emo equiatu tuchi mose, ucuasu raã naa arondete. Emo nyesequa mose mbia rese, Dios abe rese ra nyesequa bei. ²Seaquiatute se, i mose emo, equiatuã ño ũquĩ nde. ³Emo nyesequa mose Dios rese, Dios ũquĩ icua chõ nguiã ũquĩ.

⁴Mbia soo mondo mundo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co miĩ tuchi chõ Dios re. ⁵Dios abareã nguia etubiriãte re. Ibi jenda. Ibei riinda abe no. Dios raanguia tubiriãte raque no. ⁶Dios quia co miĩ tuchi nande je re. Ae quiarei nanderu tuchi. Ae miĩ ngue mbae chao ja tuchi ra. Ae miĩ ngue nandea umbaerã nda. Nandererequa miĩ tuchi chõ siqui nguiã co no. Jesucristo, i equia ee. Ae que mbae chao ja tuchi Dios rese ra. Ae miĩ ño nandemingo nguiã ã.

⁷Dios quiato mo iranuate quia ũquĩ ndese ã. Siquiche beite quiatu nguiã dios abareã si ũquĩ. Ae soo mbia mondo dios abareã je, ũquĩ mbaeiaie riqui reĩ nguiã ee. —iŨquĩ soo jẽu eã jẽ! i reĩ Dios nguiã ee. ⁸Ae nandeu quia nae, ũquĩ nda nandebuturã eã Dios je. Nandechiũ mo nda nandebuturã eã mingo. Nandechiurã nandesi teã teã mose, ũquĩ nda nandembiicuã eã no. ⁹—iŨquĩ soo ra jẽuchĩ jẽ! iãte raque Dios nande je. Mbaeiaie eãte raque ũquĩ soo. Mbaeiaie nda eriqui reĩ Jesús quiato namonda je raẽ. Jẽ eu mose, ũquĩ abe ra eu chee. —Mbaeiaie au chõchĩ, i ra ñimbiicuã tuchi cote. ¹⁰Jẽquiaru mose dios abareã chuchua, Jesús

quiato namonda ra mae jendese. Ũquĩ abe ra soo u chee, ae mbia mondo Dios abareã je. Maende jendese. Eicuã ndaque eriqui reĩ nguiã ee. ¹¹Jẽ ndaque jẽirandu ũquĩ soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenyẽ chõchĩ ũquĩ mbiicha arõte Dios si. Ũquĩ nĩ abe chõ ngue Jesucristo mano nguiã. ¹²Soo mbaeiae riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ũquĩ Cristo je. ¹³Jesús quiato mo ambiicũ sereã tuchi chõ nguiã se. Se soo u mose, ũquĩ Jesús quiato mo mbiicũ mose, soo ra auã mbei cote.

Mbae mo jembu seje Dios cheẽ nenei nenei ndibishorõ, i ãte Pablo

9 ¹Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguiã Jesucristo icua ũquĩ cote. ²Jesucristo cheẽ nenei neneisa eã ño co re, i arõte raque emo seje. Jẽ quiatu jeñee aroneate nguiã ũquĩ seje. Ũquĩ jẽingo seicua tuchite ũquĩ. Secheẽ nguire quiatu que Jesús jẽicua cote resẽ.

³Eĩ ae chõ nguiã ñee mbia ñee icuã mose seje. ⁴Se abe Jesús quiato sembuquiaru quiaru arondete raque. ⁵Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús rĩ. Sã Pedro riqui ngüinisi rerao rao no. Jesús nongue abe no. Sã Jesús cheẽ nenei neneisa ja ngüinisi rerao rao no. ⁶¿Se mĩ ño nda Jesús quiato sembuquiaru aroneate reĩ jẽje re? Bernabé abe rese. Ure Jesús cheẽ nenei nenei mose. ⁷Sã soldado siqui chooño eã comandante mbae mee eã mose ee. Sã emo ndiqui mbae tiquia chooño no. —Sechitiquia nda au chã, i chõ nguiã. Sã emo ndiqui ticuasú raarõ ñooño no. —Equiandi nda ambei chã, i chõ nguiã.

⁸Secheẽ ae eã ño ũquĩ nde. Embesa ji chõ asenei nguiã jẽje. ⁹Co rei Moisés chimbesa co:

Jẽ ticuasú mbuquiei quiei mose, echuru jemumbi eã.

Sã ae ae si quia mbae cua,

i que embesa ji ra. Ticuasú achõ je eã ngue Dios ñee nguiã. ¹⁰Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiqui tau”, i chõ nguiã eiqui iqui. ¹¹Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re? ¹²Mbae mo jemee mee nguiã Jesús cheẽ nenei neneisa mo je ũquĩ. ¿Mbaerã jẽingo emee eã ure abe je quiatu re? —iMbae mo nandei teã eo si jẽ! ure que equia oso mose jendea ra. Dios si jembicha eã sacua ño ngue mbae mo ureisi teã nguiã jẽsi. ¹³Sã Dios ñee sacerdotes je cose no. —Ae siqui quia sechuchua sacrificio raã naa nae,

sã ùquĩ ndiqui ofrenda u u bei ae, i que Dios ñee cose ra. ¹⁴Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiato ataque riqui mbae mee mee mbei ùquĩ je, i que Jesús ra.

¹⁵Dios cheẽ nenei neneisa tuchi raque se. Mbae mo ngue aisi chõ ãte jẽsi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jẽje co. Tamano ae, “mbae embu seje”, i rocoĩ jẽje. ¹⁶Dios cheẽ nenei neneisa tuchi chõ se re. Ùquĩ nii seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ùquĩ ño sebi re. —Mbae mo embu seje Dios cheẽ nenei nenei ndibishorõ, ae ãte quia co. Ùquĩ nguiã sebi re.

¹⁹Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbasa rui nae, ùquĩ ite re seico mose, Moisés chimbasa asaã saã ño nguiã se abe. Ùquĩ Jesucristo icua sacua. —Moisés chimbasa rui eico, i ãte raque Dios seje. ²¹Ae siquiã nguia Moisés chimbasa cheẽ ndui nae, ùquĩ ite re seico mose, se abe Moisés chimbasa asaã saã eã ño nguiã cote. Ùquĩ Jesucristo icua sacua. Cristo mii ñee ño amumba mumbayã nguiã co. ²²Jesús quiato quirãcuã nea ite re seico mose, ùquĩ asaã saã ño nguiã se abe, sequirãcuã nea naa naa. Ùquĩ Jesucristo icua sacua. Ae ite re aico oso oso beite nae, ùquĩ na ño aico nguiã se abe. Ùquĩ Jesucristo icua sacua. ²³Ùquĩ ja chõ asaã saã nguiã Dios cheẽ turã nii co. Nandeico turã ja sacua Jesús rese.

²⁴Sã mbia carrera raã naa no. Mbia ja chõ uchã ndaque. Co mii ño nda premio isi. Aque rã tuchi chõ jẽingo Jesús rese. Premio isi sacua naanguia. ²⁵Ae ra carrera saã saã nae, ùquĩ mbae icua secha ja chõ nguiã ùquĩ. Premio isi sacua ño eriqui nguiã mbae icua naa eã. Premio nda ua jei raque. Ae Jesús mee arõte quia nande je premio nae, ùquĩ nguia ra ua eã mbei nandesí. ²⁶Se aico choñoa nguia Jesús rese co. Jesús rese aico turã tuchi chõ nguiã se co. ²⁷Mbae asaã saã ño nguiã serete mbirãcuã co. Serete secheẽ mumbayã sacua. Se premio ganar i sacua ño aico nguiã eraã naa co. Premio isiã sebiãte, se Dios cheẽ nenei nenei tuchire. Nyebe aico nguiã siqui tuchi Jesús rese co.

Dios raanguia rese ra jẽingochĩ jẽ

10 ¹iJêtesareichĩ nda nandei ñiinda si jẽ! iMoisés mosenda si jẽ!
iÙquĩ ngue siqui ja rei ibeishĩ ndui ra jẽ! iÙquĩ ngue nyoi ja rei

Ama Ireĩ ndasa Dios ñee mose ee ra jê! ²—Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa mose ra. ³Ae Dios mee ndei ee echuurã nae, ũquĩ ngue mbia ja u u rei ra. ⁴Ae Dios mee ndei ee embei sacua nae, ũquĩ ngue mbia ja mbei mbei rei ra. I que tuutu quia sita si nae, ũquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ũquĩ mbia rese ra. ⁵Ũquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶Nandemundua sacua ño ũquĩ nde. Mbae icuã osei osei eã sacua nande chõ ũquĩ nde. Sã ũquĩ mbae icuã osei osei no. ⁷Jëingochĩ nda dios abareã ndese. Sã ũquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuasú raanguia je ra”, i que embesa ji ra. Jê nguia jëingo eã dios abareã ndese. ⁸Ũquĩ nandei que siqui siqui ngüinisiã ndese no nda. Nyebe Dios eiquia iquia tuchi nguiã. Veintitrés mil que mano aque nyaashĩ mose ra. iMbae icuã nda nandesaã saachĩ ũquĩ na jê! ⁹—Ma Cristo roseite, nandechĩ nda mbae icuã naa jê. Sã nandei riqui “ma Dios roseite” i nyii no. Sã ñi ngue eriqui mbae icuã naa mbei cose no. Sã mbei tásie riqui eiquia iquia no. iŨquĩ nandesaã saã eã tuchi chõ nguia nande jê! ¹⁰iJeñee icuã icuachĩ nda Dios rii jê! Sã ũquĩ nandei ñee icuã icuã nguia Dios rii no. Nyebe ángel nandei ñiinda iquia iquia tuchi nguiã. ¹¹Eĩ si tuchi que nandei ñiinda quia nyii ra. Dios que embesa mii nandetesarei eã sacua nda. Mbae ua ja serĩ mose chõ Dios riqui nguiã nandembesarei eã co. ¹²—Sequiracuã tuchi chõ se re, i mose emo, isã aque riqui nyiicua tuchi quiatu jê! Mbae icuã jêi nonde ee. ¹³—iMbae icuã esaã jê! i mose diablo jêje, eĩ si chõ nguia ñee mbia ataque je. Jê mii je eã. Dios quia ra ucheẽ mbuchebiã mbei. Jendeaquiato bei ra diablo ñee mose jêje. Jembiracuã ndae. Jê “nya” i sacua mbae icuã je.

¹⁴Seresenda, idios raanguia rese ra jëingochĩ jê! ¹⁵Jëaracuate rei jê ndesẽ. Secheẽ ndese jemae quiatu. ¿Acheẽ ñooño se re? Acheẽ ñooño eã se reae. Jêtea quiatu. ¹⁶Nande Santa Cena naa naa mose, Cristo ruqui mbei raanguia chõ nandeico nguiã uva rique mbei mbei. —Cristo ruqui nandembitirõ ja bei quia ã, i chõ nguia uva rique mbei mbei. Mbichae nandesiquio quio quia eu nonde nae, Cristo roo rã ño ũquĩ nde. —Cristo roo nandembitirõ ja bei quia ã, i chõ nguia mbichae u u. ¹⁷Nandetubiriãte raque Jesús quiato. Nande ja chõ aque mbichae mii nandeu ja nguia. Mbae mii na nguiatu nandeico nguiã nande ja ã. ¹⁸Judíos rese chõ jendua. Ũquĩ sacrificio raã naa mose, sacrificio eu chõ nguia ã. —Dios resete quia nandeico nguiã ã, i equia ã. ¹⁹—Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ũquĩ. ²⁰Mbia soo mondo mondo mose dios abareã je, Dios tuchi je eã ño eriqui nguiã emee mee. Aba

checuayã icuã je chõ eriqui nguiã emee mee. iAba checuayã icuã ndese ra jëingo jiri jirichĩ jê! ²¹Jê mbae mbei mose aba checuayã ndese, Jesús ruqui mbei raanguia jësaã aronea ño nguiã cote. Jëquiaru quiaru mose aba checuayã nyuchua, Santa Cena jesaã aronea ño nguiã cote. ²²¿Mbaerã jëingo Jesucristo mbupaama ite re? ¿Jëquirãcuã tuchi chõ eriqui esi jê nde?

Jesús quiato ataque rese quia jëingo ndua

²³—Ae soo mbia mee mee nguia dios abareã je nae, ùquĩ ndese ra jëocochĩ, i ãte raque Dios nande je. Dios biãte nande mbae raã ja chooño mose. Ûquĩ nii Dios ñee ãte raque nande je. Nande ae chõ nandeicua. Mbae mo Jesús quiato mo mundua icuã mose, ùquĩ si nandehui chõ. ²⁴—Nande ae nandeico Dios rese, jenyechĩ nda jê. —Mbia ja quiatu nandemingo erese, jenye quiatu. ²⁵Soo jëisichõ ño nguia mbae vender ísaa. —¿Dios abareã je co soo jemondo nyii re? ijenye chĩ nda ñee ee jê! Jëiranua mose, mbaeiaie eã ño soo jêje cote re. Jëisichõ ño nguia jëiranua. ²⁶Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùquĩ ndei nandechiurã ja. ²⁷—Nyao rã quiaru serese, i mose emo jêje, jëso chõ quiaru erese jësose mose. Ae ra echara mondo jêje, jëuchõ ño. —¿Co mbia mondo dios abareã je nyii re? jenyechĩ nda ee. Jëiranua mose, mbaeiaie eã ño jêje cote re. Jëiranua ño jëquiaru. ²⁸—Co soo que mbia mondo dios abareã je ra, i mose emo jêje, jêu eã ño cote. Ae ñee jêje nae, aque mbiicua eã sacua ño jêu eã. Aque soo jêu eã cote, jëirandu mose erese. Jê eu mose, Jesús quiato ra ndua icuã icuã cote. ²⁹Jendua icuã eã ndaque jê. Emo nguia ndua icuã arõte nguiã cote, jirandu mose jê eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰—Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹Á ndese chõ jendua. Ae nandesã saã nguia nae, Dios je chõ nandesã. Ae nandeu ndeu quia mbae nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia ra ñee turã Dios je, nandeico turã mose. ³²iMbia ra jemundua ata atate chĩ jê! —Á icuã ereae, i mose emo jêje, iùquĩ nda jësaãchĩ jê! Jê eraã mose, ùquĩ nda ndua icuã Jesús rese cote. Judíos. Judíos eã abe. Jesús quiato abe. Ûquĩ ndua icuã arõ Dios rese, jê eraã mose. ³³—Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacua eicuã si. Mbia siqui bei sacua Dios rese.

11 ¹Se rã si chõ jëingo. Sã aico Cristo rã si se no.

Eĩ jenye chõ nguia u ñumunua nua mose, i Pablo cuña je

²Acheẽ turãte quia jeniĩ co. Jendua beite quiatu quia serese. Acheẽ ngue jêje nyii, ùquĩ jemumbayã mbeite quia secheẽ ùquĩ. ³Ae ra ambesa jêje namo, iùquĩ

jëicua tuchi quiatu jê! Cristo rei hombre ja rerecua. Hombre rei ngũinisi rerecua no. Sã Dios Cristo rerecua no. ⁴Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ùquĩ. ⁵Mbia ñumunua mose, sã cuña mo ñee eã Dios je huiite suchayã. Sã cuña ãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ùquĩ. Uãquĩ huĩ na ño eriqui nguiã uãquĩ ati eã no. ⁶Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷Hombre mo nguiã uãquĩ chati aroneate nguiã Dios cheẽ nenei nenei. Dios quiatu ngue hombre chao nguiã umbaerã. Aquere que cuña mo ao hombre mbaerã cote ra. ⁸Cuña ndoquieĩ je eã ño ngue Dios hombre ao nguiã. Hombre roquieĩ je quiatu ngue Dios cuña mo ao nguiã. ⁹Cuña chirecorã eã ño ngue Dios hombre ao nguiã. Hombre chirecorã nguiatu ngue Dios cuña ao nguiã. ¹⁰Nyebe ra cuña uãquĩ ati quiatu. —Seru chõ sererecua re, i chõ nguiã uãquĩ ati. Angeles quia maete nguiã erese. ¹¹Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹²Hombre roquieĩ je chõ ngue Dios cuña ao rei nguiã nyii. Cuña abe riqui tiirĩ irĩ hombre co cote. Dios chiao ja chõ ñene. Cuña. Hombre abe. ¹³Jê ae chõ jendua mae erese. Eicuãte cuña ãquĩ ati iriã ñee Dios je. ¹⁴Hombre a boco mo siqui mose, aba ireĩte ùquĩ. —Eicuãte ùquĩ, i ja tuchi mbiamo ñooñoa nguiã ùquĩ je ã. ¹⁵Cuña mo nguiatu ea boco siqui mose, ùquĩ nguiã earõte re. Ea boco que Dios mee ee ra. Eãquĩ ati sacua. ¹⁶—Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco riquichõ, i ja chõ Jesús quiato nguiã serese ùquĩ.

Jenyao chaochĩ nda Santa Cena u mose jê

¹⁷—Santa Cena naa icuã icuã ño ngue equia ñumunua nua nda, i que mbia mo sembiirandu jeniĩ nda. Nyebe seya eãte riqui nguiã jendese. ¹⁸—Hue rĩ ja eã eriqui ndua ndua ñumunua nua mose ùquĩ, i que emo sembiirandu jeniĩ nda. —Ichõĩño eã ereae, ae sequia ndua ndua co. ¹⁹Jeñimbuchao chao chõchĩ equia ùquĩ. Mbia Jesús quiato tuchi icua sacua ño jeñimbuchao chao nguiã. ²⁰Santa Cena naa naa mose, abei chiã tuchi chõ jëingo nguiã jenyue ùquĩ. Eĩ eã tuchi que Jesucristo nandembaaquiato ra. ²¹—Se rane sembae tau ja, jenye jaaja chõchĩ nguiã Santa Cena naa naa ùquĩ. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²²Jëquiaru tuchi mose Santa Cena, jëingo icuã ño nguiã Jesús quiato ataque je ùquĩ. Mbaecha reã ireĩ ireĩ ño nguiã jësi ùquĩ. ¿Mañi ae ra ñee jêje re? Eicuãte ùquĩ ndesẽ. Jenyuchua ae ae rei jëquiaru sacua ndesẽ.

Jesús quiaru mose uchimbuaquiato rese

²³Jesucristo ae sí que sembaaquiato ra. Ñ ngue asenei ndei jêje nyii resê: Judas Jesucristo reacuquia nonde mbia icuã je, aque isa sí

que Jesucristo mbichae sirõ nda. ²⁴Gracias, i que ñee Dios je cote ra. Mbichae que esiquio uchimbaaquiato je cote ra. —iCo jẽ! Jẽu. Serete rã ño mbichae riquio ji co re. Jenii ño nda serete riquio ji cote. Co jẽu mose, jendua ndua bei quia serese, i que Jesús mbichae mondo ee ra. ²⁵Quiaru jare que Jesús eyuquia rirõ cote ra. Ñee ngue uchimbaaquiato je cote ra. —Seruqui rã ño uva rique co re. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶Jẽ co mbichae u mose, jẽ uva rique mbei mose, Santa Cena, i chõ nguiã ùquĩ je. Jẽ Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jesaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷Emo Santa Cena naa icuã icuã mose, ùquĩ siqui icuã icuã ño nguiã Jesucristo rete je ùquĩ. Ùquĩ siqui icuã icuã ño nguiã Jesucristo ruqui je ùquĩ no. ²⁸Nyebe nandendua ndua tuchi quiato quia Santa Cena naa nonde. ²⁹Emo Santa Cena naa icuã icuã mose, emo ndua eã mose Jesucristo rete rese, ùquĩ nda Dios mbasi. ³⁰Ùquĩ je chõ jendasi rasi bei riqui nguiã. Ùquĩ je chõ jẽingo nguiã mano mano tuchi. ³¹Nande ae nandereco nandeicua jiri ae. Eĩ nda Dios nandembasiã cote. ³²Jesucristo nandembasi mose, nandemundua sacua ño ùquĩ nde. Nandembitirõ sacua ño cote re. Dios nandemombo eã sacua tata cuasu chõ ùquĩ nde. Jesús quiatoã mombo mose tata cuasu.

³³Nyebe aico nguiã ñee nyecua jẽje co. Jẽ Santa Cena naa naa mose, jeñumunua nua turã ño. Jẽingo turã ño jenyue. Jenyisaarõ turã ja chõ Santa Cena u nonde. ³⁴Jemo niacuã siqui mose, sã quiaru uchuchua, Santa Cena naa nonde. Eĩ jenyue mose, Dios ra siqui turã jẽje cote, jeñumunua nua mose. Seso mose jendea ra secheẽ ataque asenei jẽje cote.

Espíritu Turã ño nandechisaã saã sacua mondo nguiã nande ae ae je

12 ¹Espíritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. Ùquĩ ndese taembiirandu cote. ²Dios abareã ndese que jẽingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheẽ andu aroneãte. Ùquĩ jẽingo Jesucristo rese ùquĩ cote. ³À ndese jendua tuchi: —Jesús icuãte riqui Dios je co, i mose emo, echeẽ ae chõ ùquĩ nde. Espíritu Turã embucheẽ eã ño nguiã ùquĩ. —Jesús rei Dios tuchi, i mose emo, echeẽ ae eã ño ùquĩ nde. Espíritu Turã ño embucheẽ nguiã ùquĩ.

⁴⁻⁶—Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã

nandembuquirãcuã co no. Dios mo eãte emo. ⁷Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacuã Dios rese. ⁸Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatu turã mbei quia, i chõ nguiã nandemo je no. ⁹—Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. ¹⁰—Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Eturã icua. Eicuã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹Eĩ ño Espiritu Turã mii nguiã ucheẽ mbuchao chao nande je co. Nandechisaã saã sacuã mee mee nande ae ae je co. Eĩ ño Espiritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹²Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. ¹³Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espiritu Turã mii nguiã nandemingo ã.

¹⁴Nanderete mii ae siqui ãte. Nanderete resenda tubiriãte riqui ã. ¹⁵Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. ¹⁶Nandeisa achõ ñee aroneate. —Eresa eã ñochĩ se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re. ¹⁷Nanderesa achõ mose nanderete resenda, ã nda nandeico rei mbae anuate co. Nandeisa achõ mose nanderete resenda, ã nda nandeico rei mbae retõ ãte co. ¹⁸Dios ae que nanderete resenda mii ja ja cose ra. —Co tamiĩ a, co abe tamiĩ a no, i jaaja que nanderete resenda mii mii nda. ¹⁹Nanderete resenda mii mose, eĩ ndei ra nanderete eãte. ²⁰Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. ²¹—Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquĩ nandei je no. ²²Ae nanderete resenda ñetẽ tuchi nae, ae nanderete resenda quirãcuã nea tuchi nae, ùquĩ nguiarei nandechireco tuchi. ²³Ae nanderete

resenda aba ireĩte nae, ũquĩ nandetea quiatu chõ nguiã. Nandechati turã ño nguiã. ²⁴Ae nanderete resenda checuate riqui nae, ũquĩ nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ũquĩ quiatu aba queteamba re. ²⁵Nyebe nanderete resenda riqui nguiã ñee aroneate nanderete resenda nongue je. —Are recoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷Ã ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸—Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguiã nde, i chõ nguiã emo je no. —Mbia rasi embucherõ cherõ nguiã nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguiã nde, i chõ nguiã emo je no. ²⁹Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde. ³¹Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ũquĩ mo asaã saã se abe, nande quia ñee Dios je. Mbae turã tuchi mo tasenei na jẽje.

Nandechesecua eã mose, Dios chirirõ ño nande re

13 ¹Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ²Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³Se nyesecua eã mose mbia rese, aico chooño mbei chõ nda se. Sembae ra amee ja raque mbia mbae cha reã je. Mbia ra serei raque, se Dios cheẽ nenei nenei mose.

⁴Ae nyesecuate quia mbia rese nae, ũquĩ nguiã siqui mingüete nguiã mbia je ã. ũquĩ nguiã eturãte riqui nguiã mbia je co. ũquĩ nguiã mae icuã icuã eãte nguiã emo mbae rese ã. ũquĩ nguiã “seaquiato tuchite se”, iãte nguiã co. ⁵Ae nyesecua quia mbia rese nae, ũquĩ nguiã “se quiatu”, iãte nguiã mbae mo je. Ae aba ireĩte nae, ũquĩ mo esaã saã eãte quia co. Ae nyesecua quia mbia rese nae, ũquĩ nguiã paama i jei jei eãte nguiã ã.

Ũquĩ nguia ndua icuã icuã eãte nguĩã emo icuã mose ee ã. ⁶Ae nyesequa quia mbia rese nae, ũquĩ nguia eya eãte riqui nguĩã, emo mbae icuã naa mose ã. Emo mbae turã naa mose quia eyate riqui nguĩã ã. ⁷Ae nyesequa quia mbia rese nae, ũquĩ ñimbirãcuã ño nguĩã mbae ja je ã. —Ichõĩño nguĩã, iã ño nguĩã mbia cheẽ je. Siqui tochi chõ nguĩã.

⁸Dios quiato ra nyesequa bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesãã eã emo mose cote. Mbia mbaaquiatusa mo eã nda emo mose cote. Ũquĩ nda ua ja chee. Dios quiato quiatu ra nyesequa bei quia. ⁹⁻¹⁰Mbae mii mii ño nandeicua icua nguĩã namo ã. Jesús tu mose quia ra mbae mii nandeicua eã cote. Dios cheẽ miite nandesenei senei nguia namo ã. Jesús tu mose quia ra mbae nandeicua ja cote. ¹¹Señetẽ mose que aico ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbae que aicua icua chõ nguia mbia riirĩ na no nda. Secuasu mose que señetẽ mosenda asecha ja cote ra. ¹²Mbae cuu rese mae naanguia chõ nandeico nguĩã mae namo. Jesús tu mose quiatu ra mbae checua ja nande je cote. Mbae mii mii ño aicua icua nguĩã namo co. Jesús tu mose quia ra mbae aicua ja cote. ¹³Ã nandeico Dios icuate ã. ã nandeico Jesucristo ru raarõ arõ ã. ã nandeico nyesequa jate mbia rese ã. Nandechesequa mose quiarei, ũquĩ eturã tuchi mbae ja si.

Mbiamo cheẽ naa naa mose

14 ¹iJenyesequase tuchi quiatu quia mbia rese jẽ! Jeñee ño nguia Dios je. —Paba, ndequirãcuã emee na seje. Mbae raã naa sacua ndeje, jenyee bei chõ nguia Dios je. —Ndecheẽ asenei senei sete ndequirãcuã je, jenyee chõ nguia ee. ²Jesús quiato mo mbiamo cheẽ naa naa mose, mbia ra eicuayã jate. Dios mii ño nda eicua nguĩã. Dios mii je chõ eriqui nguĩã ñee. Uchue si chõ eriqui nguĩã ñee. Mbia quia echeẽ icuayãte nguĩã. ³Ae Dios cheẽ senei senei nguia, ũquĩ nguia ñee nyecuate nguĩã mbia je. Ũquĩ nguia mbia mbaaracua turãte nguĩã Jesucristo riĩ. Ũquĩ nguia mbia mingo uquia tuchi nguĩã Jesucristo rese no. Ũquĩ nguia mbia mbia tuchi nguĩã Jesucristo rese no. ⁴Ae mbiamo cheẽ saã saã nguia nae, mbia mingo uquia reã ño nguĩã Jesucristo rese. Ae ae umingo uquia nguĩã erese. Ae Dios cheẽ senei senei nguia nae, ũquĩ nguia Jesús quiato mingo uquiate nguĩã Jesús rese. ⁵Mbiamo cheẽ nda jẽsaã aquiatu ja raquete seje chã. Dios cheẽ nenei nenei aquiatu mose, ũquĩ nguia eturã tuchi re. Ũquĩ nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiasa mose Jesús quiato je, eturã ño ũquĩ no nde. Jesús quiato mingo uquia chõ nguĩã Jesús rese ũquĩ.

⁶Se mbiamo cheẽ naa naa mose jẽje, ũquĩ nda jemingo uquia reãte Dios rese. Se ñee nyecua mose jẽje, ũquĩ nguia eturãte re. Ae rese Dios sembiirandu nae, ũquĩ nenei nenei mose jẽje, ũquĩ nguia eturãte re. Se

Dios cheẽ mbuchecua tuchi mose jẽje, ùquĩ nguia eturãte no nde. Se Dios cheẽ icua icua tuchi mose jẽje, ùquĩ nguia eturãte no nde. Mbiamo cheẽ naa naa si. ⁷Sã música no. Emo flauta mbucheẽ icuã icuã mose, mbia ra tonada icuayãte. Emo guitarra mbucheẽ icuã icuã mose, mbia ra tonada icuayã no. ⁸Sã soldados no. Emo corneta mbucheẽ icuã icuã mose, soldados ra icoquiata. ⁹Eĩ si chõ jẽ no nde. Jẽ mbiamo cheẽ naa naa mose, mbia ra jeñee icuayãte. Jẽ mbiamo cheẽ naa naa mose, mbia eãsa ñee ñee na ño ùquĩ nde. ¹⁰Mbia cheẽ ñumumarate eriqui rei. Ucheẽ ae raã naa mose, echecuate ee. ¹¹Emo ucheẽ naa naa mose seje, se eicuayã mose, mbiamo ño aico nguia ee. Mbiamo ño ae riqui nguia seje no. ¹²Espíritu Turã quirãcuã jenyosei tuchi quia reae. Coche tuchi chõ ùquĩ nde. Jesús quiato mingo tuchi sacuã Jesús rese chõ equirãcuã jenyosei jẽ.

¹³Nde mbiamo cheẽ naa naa mose Jesús quiato je, echeẽ na Dios je. —Paba, ndequirãcuã emee na seje. Secheẽ mbiasa sacuã mbia je, ere chõ Dios je. ¹⁴Se mbiamo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee. ¹⁵Mbiamo cheẽ abe ra asaã saã ndaque Dios je. Secheẽ abe ra asaã saã ee no. Mbia secheẽ icua ja sacuã. Mbiamo cheẽ abe ra asaã saã se irasei rasei mose. Secheẽ abe ra asaã saã se irasei rasei mose no. ¹⁶Nde mbiamo cheẽ naa naa mose Dios je, mbia ra ndecheẽ icuayãte. Ae equiatuãte, ùquĩ nda ndecheẽ icuayãte. Nyebe eriqui nguia ñee aroneate Dios je nderese. Nyebe nandechẽ sÍ chõ nandesã Dios je. ¹⁷Coche jẽingo nguia ñee Dios je. Jeñee sÍ quia nda aba saã Dios je re. Jẽ mbiamo cheẽ naa naa mose ee, jendesenda quia nda jeñee icuayãte nguia. Ùquĩ mose ra jendesenda jemingo uquia reãte Jesús rese. ¹⁸Mbiamo cheẽ aicua tuchite raque quia jẽsi co. Gracias, aete raque quia Dios je ùquĩ nii co. ¹⁹Dios quiato ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiamo cheẽ nda asaã eã ee. Mbiamo cheẽ icuayãte quia ñene. Emo nda ñee oco raque ee, icuayãte rae.

²⁰Mbia riirĩ naate ra jẽingochĩ, Seresenda. Jendua quiatu secheẽ ndese mbia cuasu rã. Coche jẽingo nguia mbia riirĩ na mbae icuã naa ndocoĩ.

²¹Å ndei Dios cheẽ mbesa ji ã:

Mbiamo tamondo rei secheẽ nenei nenei sacuã ã serimba je.

Secheẽ nda esenei senei ndei serimba je mbiamo cheẽ je.

Aquere ra serimba secheẽ mumba i i tuchi querabe, i que Dios ra, i que embesa ji ra. ²²Jemo mbiamo cheẽ naa naa mose, Jesús quiatoã mundua sacuã Dios rese chõ ùquĩ nde. Jẽ Dios cheẽ nenei nenei mose, Jesús quiato mundua sacuã ño Dios rese chõ ùquĩ no nde. ²³Jesús quiato ñumunua nua mose u, sã mbiamo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese. ²⁴Coche jẽingo nguia Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicua

ndese. —Seicuã tuchi chõ aico se re, i ra jeñee andu mose. ²⁵Ae rese ndua ndua uchiangui renda icuã nae, Espiritu Turã ae ra ùquĩ mbuchecua checua nguĩã ee. Nyebe ra ngoi nguĩã ndese ñee turã Dios je. —Dios riqui tuchi jendese a, i ra ñee jêje.

Mbae jësaã turã turã ja chõ nguia jeñumunua nua mose

²⁶—Eĩ jenye quiatu quia ñumunua Jesús riĩ, ae ra jêje cote. Emo irasei rasei. Emo mbia mbaaquiату quiatu Jesús riĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbia mingo ja sacua Dios rese chõ ùquĩ nde. ²⁷Mbiamo cheẽ jësaã saã mose ñumunua mose, jë nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa. ²⁸Jemo echeemo mbiasa aquiatuã mose, mbiamo cheẽ nda jësaã saãchĩ, jeñumunua mose. Jeñumunua eã mose quiatu mbiamo cheẽ jësaã saã jë ae Dios je. ²⁹Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua ùquĩ ñee ndese. Eĩ ngue ra, i sacua. Eĩ eã ngue ra, i sacua abe echeẽ icua mose no. ³⁰Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹—Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacua. Mbia siqui tuchi sacua Dios rese. ³²—Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chĩ mose Dios cheẽ nenei nenei. ³³Jemo ñee mose jenongue cheẽ cúaa, Dios biãte ùquĩ. Jeñee turã mose nyuuru uru, ùquĩ nguia Dios bite re. Eĩ ja chõ Dios quiato nguia iglesia jenda ja. ³⁴Jeñumunua nua mose Dios riĩ, cuña mo nda ñeechĩ. Eĩ si que Moisés chimbese no nda. Sã cuña ndiqui mbia cheẽ mumbayã mbei. ³⁵—Ùquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatus mose. Cuña mo ñee aroneate Jesús quiato chumunua nua ite re. ³⁶—Ichõiño nguia ÷jenye quia secheẽ mose re? Jë nane je eã ngue Dios ñee ndesẽ. Jë mĩ je eã ngue Dios ñee ndesẽ. ³⁷Secheẽ ae eã ambesa nguia jêje co. Dios cheẽ ño ambesa nguia jêje. —Dios que uquirãcuã mee seje ra. Ucheẽ nenei nenei sacua, i mose jemo ñee, sã ùquĩ nane ñee seriĩ. —Dios cheẽ tuchi chõ Pablo senei senei nguia, sã i seriĩ. ³⁸Ùquĩ secheẽ isi sereã mose, jëhui chõ esi. Sã equiatuã ae riqui. ³⁹iDios cheẽ jësenei seneise tuchi quiatu jë! Jemo mbiamo cheẽ naa naa mose iecheẽ nda jësiquisã quisãchĩ jë! ⁴⁰iMbae jësaã turã turã ja chõ nguia jeñumunua nua mose jë! Jenyuuru uru turã ño nguia.

Cristo quera si mose

15 ¹Dios cheẽ turã ngue asenei senei nguia jêje Jesucristo riĩ nae, ùquĩ sí rese chõ aico nguia jemundua ndua co. Ùquĩ ngue jëisi

turãte. Jẽingo beite ũquĩ ndese ũquĩ. ²Ũquĩ ndiqui jemingo beite ũquĩ, jẽtesareĩã mose secheẽ si. Ũquĩ jẽingo Jesucristo icua iruã ũquĩ. ³Ae Dios senei senei seje nae, ũquĩ nane ngue asenei senei jẽje ra: Jesucristo que mano nandeicua ndiquicharõ. Embesa ji cheẽ nguire. ⁴Mbia que echati rei. Tres días mose que quera si. Embesa ji cheẽ nguire. ⁵Quera si mose que nyecua Pedro je. Aquere que nyecua uchimbbaaquiato doce je cote. ⁶Quinientos uquiato je que nyecua cote. Hue equiatio chi ja mose ñumunua. Ũquĩ tubiriãte riqui ã. Emo emo ngue mano nda. ⁷Nyecua que Jacobo abe je cote no. Aquere que nyecua uchimbbaaquiato jaje cote. ⁸Nyecua nyecua jare mbia je que nyecua chee se abe je cote ra. Sã cuña ndiqui erã mo mbua no, ũquĩ na si chõ aico rei nguiã se co. ⁹Se quia señetẽ jiri riqui nguiã Jesús chimbbaaquiato ataque si co. —Jesús chimbbaaquiato chõ se re, ae eã jiri quia co. Seicua tuchi quiato ngue Dios quiato je nyii re. ¹⁰Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echimbbaaquiato ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese. ¹¹—Aba Dios cheẽ senei senei tuchite quia reae, ure ãte equia co. Ũquĩã ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbia raaque quera si mose

¹²—Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re. ¹³¿Cristo raaque bei namo nde? —Mbia raaque ra querayã mbei, jenyẽ mose, ¿mañi Cristo raaque quera re no? ¹⁴Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jẽicua iru chõ ndei. ¹⁵Cristo raaque quera si eã mose, eĩ nda ureico rei ñee ñooño Dios riĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no. ¹⁶Mbia raaque querayã mose, eĩ nda Cristo raaque quera eãte rei no. ¹⁷Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicua nderequia beite no. ¹⁸Eĩ nda Cristo quiato quiachã mbei rei manonde no. ¹⁹A miĩ eã ño Cristo riqui nguiã nanderese. Nandemanonde abe ra eriqui bei nanderese no. A miĩ mose, eĩ nda nandeya eã tuchite riqui rei mbia mo si no. ²⁰Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹Adán miĩ nane ngue mano huĩcuã je cose ra. Nyebe nandeico nguiã mano mano mbei cote. Eĩ si chõ Cristo miĩ quera si nguiã cote. Nyebe ra uquiato mbuquera si ja cote. ²²Sã nandeico mano mano ja Adán ndui ã no, eĩ si ra Cristo nandembuquera quera no. ²³Dios que Cristo rane mbuquera nandesĩ ra.

Cristo tube mose, uquiato raaque ra embuquera ja cote. ²⁴Cristo tube mose ra mbae ibi jenda ua ja cote. Mbia mo nda siquĩã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã. ²⁶Mbia mano mano mose, Cristo biãte ũquĩ. Ũquĩ abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii. ²⁷Dios que mbae mee ja Cristo je ra. Cristo mbae rerecua ja tuchi sacuã. —Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸Dios mbae mee ja mose Cristo je, Cristo ra ñimee Dios je cote no. Eriirite quia ñene. Eĩ nda Dios mbia rerecua ja tuchi cote.

²⁹Emo emo ño bautizar i nguiã eraaque riĩ ũquĩ. Eraaque quera si eã mose ¿mbaerã ũquĩ ndiqui bautizar i eraaque riĩ nde? ³⁰Mbia raaque quera eã mose, eĩ nda ureico rei Dios chee nenei nenei ãte mbia je co. Eĩ nda mbia riqui rei ureiquia serĩ serĩ ãte. ³¹Mbia “taiquia” i bei beite quia seje ã. Achee ñooño eãte jėje. Sã seyate riqui jendese co no. ³²Nyacia rã tuchi que Efeso jenda riqui seje ra. Ũquĩ ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeico rei ñee. —Mbae nandembei chooño. Mbae nandeu chooño. Mano mbei cote, i. ³³—Eĩ jentye quiatu iichĩ nda mbia jembiiĩrĩ irĩ jē! Jeingo mose mbia icuã ndese, jembiiicuã icuã nda jē abe cote. ³⁴Jendua quiatu. Mbae turã nguiatu jesaã saã nguiã. Mbae icuã jesaã eã nguiatu quia. Jemo emo ndiqui Dios icuayãte ũquĩ. Aba ireĩ tuchi quiarei ũquĩ.

Jesús quiato rete yasu ja ra cote

³⁵Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae. ³⁶Ndua eã ño nguiã ũquĩ. Sã nandeico mbae eĩ tiquia no. Mbae eĩ nda soõ suri sacuã cote. Eĩ si chõ nda nanderete soõ nandemano mose. Nanderete yasu sacuã cote. ³⁷Sã nandeico mbae eĩ tiquia no. Ei ra nandechitiquiyã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote. ³⁸—Ĩ ño nda ndei, i chõ Dios nguiã mbae eĩ jaje. ³⁹Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa riinda rete no nde. Ae mbebe quia, erete ae chõ ũquĩ no nde. Sira ae erete mo no nde. ⁴⁰Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴²Eĩ si chõ mbia raaque quera je re. Ae mbia raaque nandechitiquia quia nae, ũquĩ ndei soõ je ũquĩ. Ae ra quera si nae, ũquĩ nda soõ eã mbei cote. Manoa mbei ra eno. ⁴³Ae nandechitiquia quia nae, eraaque tuchi

chõ ùquĩ nde. Ae ra quera si nae, enininya tuchi chõ ùquĩ cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴Ã nanderete nandereco ã nae, erete achõ ño ùquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ùquĩ nda manoa no. ⁴⁵Ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingõ beisa rei aque. ⁴⁶Ã nanderete nandereco ã nae, mano mano mbei arõte. Ùquĩ nane nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸Ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ùquĩ cote. ⁴⁹Ae Dios chao ibi je nyii nae, Adán i equia ee nae, aque rã si chõ nandeico nguiã nande abe namo ã. Aquere ra nandeico ibatenda rete rã cote. ⁵⁰Nanderoo achõ ño nanderete re. Nanderuqui abe no. Ùquĩ oso aroneate ibate Dios récuua. Ae mano nguia soõ nae, ùquĩ nyoĩ aroneate Dios récuua. Ae mbia riqui manoa mbeite nae, huee nanderoo oso aroneate. ⁵¹Ae rese mbia riqui jiranuate nae, ùquĩ tasenei na jêje. Nandemano ja eã ndae. Nandechiicabo ja chõ ndae. ⁵²Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose ra nandechiicabo bei nande abe cote. ⁵³Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴Nanderete nyiicabo mose, ùquĩ mose ra embesa ji cheẽ io cote: “Nandemano ngue ua tuchi cote ra”, i ñi embesa ji re. ⁵⁵Nanderasi ra nandequiayã cote. Ibicua ra nanderaarõã cote. ⁵⁶Nandeicuã ño nandemano mbu uquia nguiã nande je co. Moisés chimbesa chõ nandeicuã mbuchecua nguiã nande je co. ⁵⁷Dios ra nandemano siquisã mbei nandesi cote Jesucristo riĩ. Nyebe nandeico nguiã gracias i tuchi Dios je ã cote. ⁵⁸Seresenda ijenĩmbirãcuã tuchi quiatu quia jê! iJesucristo rese jẽingo bei quiatu quia jê! iEcheẽ jẽsenei senesi mbei tuchi quiatu quia jê! Ae jẽsaã saã nguia Jesucristo rese nae, jẽsaã iru iruã ño nguiã ùquĩ.

Ofrenda jembae jendecoquiato, i Pablo

16 ¹Ae ofrenda ra jemondo Jesús icuasa je nae, ùquĩ tasenei jêje. Acheẽ ngue Jesús quiato je ra. Galicia jenda je ra. Eraã si chõ jẽingo ae. ²Domingo mose bei jẽingo mbae rerecúe cúe ae. Ofrendarã ã. Ae mbae isi atate quia, sã aque mbae rerecúe ata jiri ae. Ae mbae isi miite quia, sã aque co miĩ jiri rerecúe ofrendarã ae. Ùquĩ jemunua ino seso nonde jendea ae. Eĩ

mose ra ofrendarã jësaã eã seico mose jendese cote. ³Secuasẽ mose huee, jeñimondo sacua mo jëirabo ino, ofrenda rerao sacua. Cartas nandemondo ùquĩ oo. Ofrenda rese. Ùquĩ nda amondo Jerusalén ña. Ofrenda rerao sacua hue jenda Jesús quiato je. ⁴Ofrenda tubiriã mose ra aso se abe erese.

Aso ra jendea, i Pablo

⁵Macedonia ñi nane nda acua. Aquere ra aso ngasẽ jêje cote. ⁶Aico arete jiri ra jendese huee reae. Ama mose bei ra aico jendese huee reae. Eĩ jenyen da sembucata turã mondo cote, seso mose mbaranguiti. ⁷Amaeño sereãte jendese secua mose. Aico arese rete jendese huee, Dios eno i mose seje. ⁸Efeso taico are rã nyii. Fiesta de Pentecostés mose. ⁹Dios cheẽ asenei senei arõ tuchite mbia je a. Mbia seanduse rete. Emo emo icua icuaete riqui Dios cheẽ nenei nenei mose seje ã no.

¹⁰Timoteo ngasẽ mose jêje ijëisi turã ño jê! iSã eireĩ ngufã tuchi jësi jê! Se rã si chõ eriqui bei nguiã Dios cheẽ nenei nenei mbia je aque. ¹¹iNyebe jemo Timoteo isiteã eã jê! iJembucata turã ño imbu seje jê! Aico eraarõ arõ tuchi se a. Nanderesenda ataque rese.

¹²Acheẽ ndei que nanderesenda Apolos je ra. —Nde abe eso erea, ae rei que ee jeni nda. Oso sereã ngue namo nda. Osobi mose quia nda esi nguiã jendea cote.

Pablo ñee hui bei

¹³iJendua tuchi quiatu quia jê! iJesucristo jëicua tuchi quiatu quia jê! iJësiquicheã tuchi quiatu quia jê! iJëquirãcuã tuchi quiatu quia jê! ¹⁴iMbia rese jenyesequa tuchi quiatu quia mbae raã naa mose jê! ¹⁵Seresenda, jëingo Estéfanos chuchua jenda icua jate ùquĩ. Ùquĩ nane tuchi ngue Jesús icua Acaya jenda nyii nae. Ùquĩ ndiqui mbae mondo mondo bei Jesús quiato je ùquĩ. Ùquĩ ndiqui mbae raã naa mbei Jesús quiato je ùquĩ. ¹⁶Ùquĩ na si chõ jëingo. Ùquĩ ñee nda jemumbachĩ. Ae Dios cheẽ senei senei nguia nae iùquĩ ñee nda jemumbachĩ jê! ¹⁷Seya tuchi Estéfanos ngaẽ mose serea. Fortunato abe. Acaico abe. Ùquĩ ngue sembia tuchi ngaẽ jëingoã mose a ra. Ae jësaã aroneate quia seje nae, ùquĩ ño ngue esaã ngaẽ seje a ra. ¹⁸Ùquĩ ngue sechiã mbucoite Dios rese ra. Jeñia abe mbucoite ereae. Gracias jenyen bei ùquĩ je.

¹⁹Jesús quiato Asia jenda ja chõ saludos mondo quia jêje aque. Aquila abe saludos mondo quia jêje aque. Priscila abe. Ae Jesús quiato ñumunua nua nguia ùquĩ nyuchua nae, ùquĩ ja abe saludos mondo quia jêje Jesucristo riĩ aque. ²⁰Jesús quiato a jenda ja saludos mondo quia jêje aque. Jenyiquiaama ama ja quiatu quia Jesús riĩ.

²¹Seo je tuchi co saludo ambesa mondo quia jêje aque. Pablo tuchi chõ se re. ²²Emo nyesequayã mose Jesucristo rese, sã Dios embasi. Echu, Jesucristo. ²³Jesucristo turã nda siqui jendese chã. ²⁴Achesecua ja chõ nguiã jendese Jesucristo riĩ co. Amén.